

- 1<sup>r</sup> Wer hie anzündt syn ampel wol
- 2<sup>r</sup> Vnd brennen loßt syn liecht / vnd ol
- 3<sup>r</sup> Der selb sich ewig fröwen sol



## Ablossung guter werck

- 1 Der ist eyn narr / der zů der zyt
- 2 So gott syn letstes vrteil gyt
- 3 Sich vrteyln muß vß eygnem mundt
- 4 Das er verschlagen hat syn pfundt

2 vrteil GW5046 GW5047 ] vrteyl GW5041

5 Das jm entfolhen hat syn her  
 6 Das er do mit solt gwynnen mer  
 7 Dem würt das selb genomen hyn  
 8 Vnd er geworffen jnn die pyn /  
 9 Des glich ouch die jr ampel hant  
 10 Verschütt / vnd nit mit öl gebrant  
 11 Vnd went erst süchen ander öl  
 12 So yetz vß faren ist die sel /  
 13 Vier kleyne ding sint yetz vff der erd  
 14 Sint wyser doch dann menschlich gberd /  
 15 Die omeyß die keynr arbeyt schont  
 16 Eyn hâslin das jm velsen wont /  
 17 Die hewstâff / die keyn künig hant  
 18 Vnd ziehen doch zû veld all sant /  
 19 Eyn aydes gat vff syn henden vß  
 20 Vnd wont doch jn der künig huß /  
 21 Wer hunig fyndt vnd wafen scharpff  
 22 Der âß nit me dann er bedarff  
 23 Vnd hût vor füllung sich der süß  
 24 Das ers nit wider spüwen muß  
 25 Ob joch eyn wiser gâhling stirbt  
 26 Syn sel doch nymer me verdyrbt /  
 27 Aber der narr vnd vnwiß man  
 28 Verdyrbt vnd muß syn husung han  
 29 Jnn ewikeyt jn synem grab /  
 30 Den frömden loßt er sel / vnd hab /  
 31 Keyn grösser dor wart nye gemacht  
 32 Dann der das künfftig nit betracht  
 33 Vnd zytlichs für das ewig acht  
 34 Es brennt manch boum jnn hellen glût  
 35 Der nit wolt tragen güte frucht

---

**12** faren *GW5046 GW5047* ] farend *GW5041*   **15** keynr *GW5046* ] keyner *GW5041 GW5047*  
**29** ewikeyt *GW5046 GW5047* ] ewigkeit *GW5041*